



30.april 2019

UPA2019/155

**Sulisartup sunniuteqarfiginngisaanik piffissami sivikitsumi tunisassiornermik unitsitsigallarneq pissutigalugu angerlartitaanermi suliffeqarnermi ikiorsiissutinik pissarsisinnaanerup annertusitineqarnissaa, suliffeqarfinni sunngaluartuniluunniit sulianut suugaluartunulluunniit atuutsineqalernissaa anguniarlugu sulinermi ikiorsiissutit pillugit Inatsisartut inatsisaata nr. 2 majip 15-ianeersup 2014 allanngortinneqarnissaa kingusinnerpaamik UPA2020-imi siunnersuuteqaqqullugit Naalakkersuisut peqquneqarnissaannik Inatsisartut aaliangiiffigissaattut siunnersuut**

(Inatsisartunut ilaasortaq Aleqa Hammond, Nunatta Qitornai)

Inuiaqatigiit sulisussatigut, ilinniarsimassutsikkut allatigullu imminut pilersortut pigilernissaat anguniarlugu aqutissiuusseqataassuugut suleqatigiissuugullu.

Ilinniarsimassutsikkut aatsaat taama qaffasitsigisumik inissisimalerpugut. Ukiut tamaasa ilinniarsimassutsikkut imminullu pilersorsinnaassutsikkut qaffasinnerusumik inissikkiartuinnarnerput peqquteqarput inuit angusaqarumallutik namminersortuujumassusaallu annertoq piummat.

Ukiuni kingullerni qujanartumik suliffissaaleqinerup appariartuinnarnera nuannaarutigeqaarput. Inuiaqatigiit pisortanut pinngitsuuisinnaanerat annikilliartorpoq imminullu pilersorneq qaffariaateqaqaluni, tamanna qujanaqaaq.

Suliffeqarneq imminut akilersinnaasoq ujarorneqartuassaaq. Imminut pilersorsinnaanerup qaffassarneranut suliniarnerup aqutissap ilagilluinnapaa pisortanit ikiorsiissuteqartarnerup aqqissuussaaneratigut aaliangersakkat sulerusussuteqarnissamik nassataqassammat. Sulineq imminut akilersinnaasoq aqutissiutissangaanni pisortanit pisartakkat piffissaq ungasinnerusoq eqqarsaatigalugu pigiinnarnissaanut kajuminnanngitsuunissaamut aqqissuussineq. Imatut paasillugu sulineq imminullu pilersorusunneq aqutaassaaq qitiutinneqartoq.

Namminerli piumassuserinngisamik suliffeerukkallartarneq inummut imminut pilersorumasumut ilungersunartoq ilisimavarput, tamannalu annikinnerpaaffianiitinniarlugu sulineq pisariaqarpoq.

Siunnersuuteqartup aqut ingerlaffigineqartussaq Naalakkersuisunit ilalernerqanngilaq, taamaakkaluartorli susasaqartut arlariit peqataatinnerisigut inassuteqaasiornissaanut allannguutissamik siunnersuusiorput. Tamanna isumaqarpugut ataatsimiititaliamit nalilersorneqasasooq taamaammallu inuussutissarsiornermut ataatsimiititaliamut ingerlateqqipparput.